



11 Mei 2012
11 May 2012
P.U. (A) 133

WARTA KERAJAAN PERSEKUTUAN

FEDERAL GOVERNMENT GAZETTE

KAEDAH-KAEDAH CUKAI PENDAPATAN (PERKIRAAN PENENTUAN HARGA AWAL) 2012

INCOME TAX (ADVANCE PRICING ARRANGEMENT) RULES 2012



DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA CUKAI PENDAPATAN 1967

KAEDAH-KAEDAH CUKAI PENDAPATAN
(PERKIRAAN PENENTUAN HARGA AWAL) 2012

SUSUNAN KAEDAH-KAEDAH

Kaedah

1. Nama dan permulaan kuat kuasa
2. Tafsiran
3. Skop dan pemakaian
4. Permintaan untuk mengadakan mesyuarat prapemfailan
5. Pengemukakan permohonan untuk perkiraan
6. Hal keadaan apabila perkiraan penentuan harga awal ditolak
7. Penarikan balik perkiraan penentuan harga awal
8. Kuasa untuk meminta maklumat lanjut
9. Andaian kritikal
10. Pendapat oleh pakar bebas
11. Kesan perkiraan penentuan harga awal
12. Tempoh yang diliputi di bawah perkiraan penentuan harga awal
13. Permintaan untuk pemakaian ke belakang
14. Pemfailan laporan pematuhan perkiraan penentuan harga awal
15. Pelarasan ganti rugi
16. Kajian semula pematuhan perkiraan penentuan harga awal
17. Semakan perkiraan penentuan harga awal
18. Pembatalan perkiraan penentuan harga awal
19. Pemansuhan perkiraan penentuan harga awal
20. Pembaharuan perkiraan penentuan harga awal
21. Kerahsiaan maklumat
22. Establismen tetap sebagai suatu entiti berasingan

AKTA CUKAI PENDAPATAN 1967

KAEDAH-KAEDAH CUKAI PENDAPATAN
(PERKIRAAN PENENTUAN HARGA AWAL) 2012

PADA menjalankan kuasa yang diberikan oleh perenggan 154(1)(*eb*) Akta Cukai Pendapatan 1967 [*Akta 53*], Menteri membuat kaedah-kaedah yang berikut:

Nama dan permulaan kuat kuasa

1. (1) Kaedah-kaedah ini bolehlah dinamakan **Kaedah-Kaedah Cukai Pendapatan (Perkiraan Penentuan Harga Awal) 2012**.

(2) Kaedah-Kaedah ini disifatkan telah mula berkuat kuasa pada 1 Januari 2009.

Tafsiran

2. Dalam Kaedah-Kaedah ini—

“metodologi penentuan harga pindahan” ertinya metodologi yang diperuntukkan dalam Kaedah-Kaedah Cukai Pendapatan (Penentuan Harga Pindahan) 2012 [*P.U. (A) 132/2012*];

“pembayar cukai” ertinya orang yang boleh ditaksirkan dan dikenakan cukai di bawah Akta;

“perkiraan penentuan harga awal” ertinya suatu perkiraan yang dibuat untuk menentukan lebih awal suatu set kriteria yang sesuai untuk memastikan harga pindahan selengan bagi suatu transaksi yang diliputi;

“Perkiraan Penentuan Harga Awal Dua Hala” dan “Perkiraan Penentuan Harga Awal Pelbagai Hala” ertinya perkiraan penentuan harga awal yang diperuntukkan di bawah seksyen 132 Akta;

“Perkiraan Penentuan Harga Awal Sehalu” ertinya perkiraan penentuan harga awal yang diperuntukkan di bawah seksyen 138C Akta;

“Pihak Berkuasa Berwibawa” ertinya Pihak Berkuasa Berwibawa yang dirujuk dalam apa-apa perkiraan yang dibuat di bawah seksyen 132 Akta;

“tempoh yang diliputi” ertinya tempoh asas bagi suatu tahun taksiran yang diliputi di bawah perkiraan penentuan harga awal;

“transaksi yang diliputi” ertinya transaksi rentas sempadan yang diliputi dalam perkiraan penentuan harga awal.

Skop dan pemakaian

3. (1) Tertakluk kepada Kaedah-Kaedah ini, pembayar cukai yang menjalankan transaksi rentas sempadan boleh memohon kepada Ketua Pengarah untuk suatu perkiraan penentuan harga awal berhubung dengan suatu transaksi yang diliputi bagi terma dan syarat yang ditetapkan.

(2) Bagi maksud subkaedah (1), harga pindahan selengan berkenaan dengan perkiraan penentuan harga awal hendaklah dipastikan mengikut Seksyen 140A Akta, Kaedah-Kaedah Cukai Pendapatan (Penentuan Harga Pindahan) 2012 dan perkiraan yang dibuat di bawah seksyen 132 Akta.

Permintaan untuk mengadakan mesyuarat prapemfailan

4. (1) Pembayar cukai hendaklah membuat suatu permintaan secara bertulis kepada Ketua Pengarah untuk mengadakan suatu mesyuarat prapemfailan berkenaan dengan suatu perkiraan penentuan harga awal dua belas bulan sebelum hari pertama tempoh yang diliputi yang dicadangkan.

(2) Bagi maksud subkaedah (1), pembayar cukai hendaklah mengemukakan bersama dengan permintaan itu, suatu draf rangka mengenai perkara itu kepada Ketua Pengarah yang hendaklah terdiri daripada—

- (a) model perniagaan dan maklumat industri pembayar cukai itu;
- (b) skop transaksi dan tempoh yang akan diliputi; dan
- (c) metodologi penentuan harga pindahan yang dicadangkan dan suatu penjelasan sama ada metodologi itu mematuhi prinsip selengan.

(3) Setelah menerima draf rangka mengenai perkara itu daripada pembayar cukai, Ketua Pengarah boleh menghendaki pembayar cukai untuk mengemukakan apa-apa maklumat lain yang berhubungan dengan permintaan untuk mengadakan suatu mesyuarat prapemfailan.

(4) Ketua Pengarah hendaklah memberitahu pembayar cukai dalam tempoh empat belas hari selepas mesyuarat prapemfailan itu tentang keputusannya sama ada pembayar cukai boleh meneruskan untuk mengemukakan suatu permohonan untuk perkiraan penentuan harga awal.

Pengemukakan permohonan untuk perkiraan

5. (1) Tertakluk kepada subkaedah 4(4), pembayar cukai boleh mengemukakan kepada Ketua Pengarah suatu permohonan untuk Perkiraan Penentuan Harga Awal Sehala, Perkiraan Penentuan Harga Awal Dua Hala atau Perkiraan Penentuan Harga Awal Pelbagai Hala dalam borang yang ditetapkan dalam tempoh dua bulan selepas penerimaan pemberitahuan itu.

(2) Apabila permohonan diterima, Ketua Pengarah hendaklah mempertimbangkan permohonan itu dan boleh mencadangkan suatu metodologi alternatif, atau menghadkan atau meluaskan skop perkiraan penentuan harga awal yang dicadangkan.

Hal keadaan apabila perkiraan penentuan harga awal ditolak

6. (1) Ketua Pengarah boleh menolak suatu permohonan untuk perkiraan penentuan harga awal di bawah apa-apa hal keadaan yang berikut: